

M013O: Annolied (O: Opitz)

1,1 VVlr horten ie dikke singen
1,2 Von alten dingen
1,3 Wi snelle helide vuhten
1,4 Wi si veste burge brechen
1,5 Wi sich liebin vuiniscfte schieden
1,6 Wi riche Kuonige al zegiengen
1,7 Nu ist ciht daz wir dencken
1,8 Wi wir selve suolin enden
1,9 Crist der vnser hero guot
1,10 Wi manige ceichen her vns vure duot
1,11 Als er uff in Sigeberg havit gedan
1,12 Durch den diurlichen man
1,13 Den heiligen bischof Annen
1,14 Durch den sinin willen
1,15 Da bi wir uns suolin bewarin
1,16 Wante wir noch suolin varin
1,17 Von disime ellendin libe hin c in ewin
1,18 Da wir imer suolin sin

2,1 IN der werilde aneginne
2,2 Duo liht war vnte stimma
2,3 Duo diu vrone Godis hant
2,4 Diu spehin werch gescuph so manigvalt
2,5 Duo deilti Got sini werch al in zuei
2,6 Disi werlt ist daz eine deil
2,7 Daz ander ist geistin
2,7a dannini lisit man daz zua werilte sin
2,7b diu eine da wir inne birin
2,7c diu ander ist geistin
2,8 Duo gemengite dei wise Godis list
2,9 Von den zuein ein werch daz der mennisch ist
2,10 Der beide ist corpus unte geist
2,11 Dannin ist her na dim engele allermeist
2,12 Alle gescaft ist an dem mennischen
2,13 So iz sagit daz Evangelium
2,14 Wir suolin un c ir dritte werilde celin
2,15 So wir daz die Crichen horin redin
2,16 Z den selben erin ward gescaphin Adam

- 2,17 havit er sich behaltin
- 3,1 DU sich Lucifer du ce ubile gevieng
3,2 Vnt Adam diu Godis Wort ubirgieng
3,3 Duo balch sig is Got desti mer
3,4 Daz her andere sini werch sach rechte gen
3,5 Den Manen vnt en sunnen
3,6 die gebin ire liht mit wunnen
3,7 Die sterrin bihaltent ire vart
3,8 Si geberent vrost vnte hizzze so starc
3,9 Daz fuir havit ufwert sinen zug
3,10 Dunnir unte wint irin vlug
3,11 Di wolken dragint den reginguz
3,12 Nidir wendint wazzer irin vluz
3,13 Mit bluomin cierint sich diu lant
3,14 Mit loube dekkit sich der walt
3,15 Daz wilt havit den sinin ganc
3,16 Scone ist der vuogilsanc
3,17 Ein iwelich ding diu e noch havit
3,18 Di emi Got van erist virgab
3,19 Ne were die zuei gescephte
3,20 Di her gescuph die bezziste
3,21 Die virkerten sich in diu doleheit
3,22 Dannin hubin sich diu leiht
- 4,1 CUnt ist wi der vient virspun den man
4,2 Zi scalke wolt er un havin
4,3 So vuort er c ir hellin
4,4 die vuonf werlt alle
4,5 Vnze Got gesante sinin sun
4,6 Der irloste vns von den suonden
4,7 Ce opfere wart her vuor uns braht
4,8 Dem dode nam her sini maht
4,9 Ce hellin vur her ane sunden
4,10 Her herite si mit gewelde
4,11 Der tiuvel virlos den sinin gewalt
4,12 Wir wuordin al in vrie gezalt
4,13 In der doufe wuorde wir Cristis man
4,14 Den Heirrin suolin wir minnan
- 5,1 VP huof Crist sinis crucis vanin
5,2 Die zueilf bodin hiz her in diu lant varin
5,3 Vane himele gaf her un diu craft
5,4 Daz si ubirwunden diu heidinscapht
5,5 Rome ubirwant Petrus
5,6 Diu Crieche der wise Paulus
5,7 Seint Andreas in Patras
5,8 In India der guode Thomas

- 5,9 Matheus in Ethyopia
 5,10 Symon unte Iudas in Persia
 5,11 Seinte Iacobus in Hierusalem
 5,12 Nu is her dar in Galicia bisten
 5,13 Iohannes dar in Epheso
 5,14 Vili suoze kond er predigin
 5,15 Vz des grabi noch wehsit himilbrot
 5,16 Daz dekkit manigir slahte noht
 5,17 Andre mertirere manige
 5,18 So iz witin ist ci sagine
 5,19 Mit heiligem irin bluode
 5,20 Irvuoldin Christis gemuode
 5,21 Mit arbeiden quamen si c irin heirrin
 5,22 Nu havit her si mit erin
- 6,1 DIe Troianischen Vranken
 6,2 Si suolin is iemir Gode danken
 6,3 Daz her un so manigin heiligin havit gesant
 6,4 So iz dar in Koln ist gewant
 6,5 Dad ir restit ein suolich menige
 6,6 Van Senti Mauriciin herige
 6,7 Vnt eilf tusent megide
 6,8 Durch Cristis minn irslagene
 6,9 Manige bischof also herin
 6,10 Die dir ceichinhaftig warin
 6,11 Als iz mer ist vane Sent Annin
 6,12 Des love wir Crist mit sange
- 7,1 CE Kolne was her gewihet bischof
 7,2 Des sal diu stat iemir loben Got
 7,3 Daz in der sconistir burge
 7,4 Di in Diutischemi lande ie wurde
 7,5 Rihtere was der vrumigisti man
 7,6 Der ie ci Rini biquam
 7,7 Ci diu daz diu Stat desti heror diuhte
 7,8 Wandt si ein so wise herdum irluhte
 7,9 Vnte diu sin dugint desti pertir weri
 7,10 Daz her einir so herin stedi plegi
 7,11 Koln ist der heristin burge ein
 7,12 Sent Anno braht ir ere wole heim
- 8,1 OB ir willit bekennin
 8,2 Der burge aneginne
 8,3 So virnemit vmbe die grimmin heidinscapht
 8,4 Dannin den aldin burgin quam diu crapht
 8,5 Ninus hiz der eristi man
 8,6 De dir ie volcwigis bigan
 8,7 Her saminodi schilt unti sper

8,8 Des lobis was her vili ger
8,9 Halspergin unti brunievn
8,10 Duo gart er sic c iih sturm
8,11 Die helmi stalin heirti
8,12 Du stift er heriverti
8,13 Diu liute warin vnz an diu
8,14 Vil ungeleidigete
8,15 Ir iwelich haviti sin lant
8,16 An din andirin sich niwiht ni want
8,17 Vngewenit warin si ci wige
8,18 Vili lieb was daz Nino

9,1 NInus leirti sini man
9,2 Aribeti lidin
9,3 In gewefinin ritin
9,4 Daz si vreis in gidorstin irbidin
9,5 Schiezin unti schirmin
9,6 Her ni liz si ni gehirmin
9,7 Vnz er gewan ci siner hant
9,8 Elliu Asianischi lant
9,9 Da stipht er eine burg sint
9,10 Einir dageweidi wiht
9,11 Driir dageweidi lank
9,12 Michil was der sin gewalt
9,13 Diu burg nant er nah imo Ninive
9,14 Da sint der merevisch Jonam uz spe

10,1 SIn wif diu hiz Semiramis
10,2 Diu alten Babilonie stiphti si
10,3 Van cigelin den alten
10,4 Die die gigandi branten
10,5 Duo Nimbrot der michilo
10,6 Geriht un dumplicho
10,7 Daz si widir Godis uortin
10,8 Einen turn worhtin
10,9 Van erdin uf ce himele
10,10 Des dreif si Got widere
10,11 Duo her mit sinir gewalt
10,12 Gedeilt si so manigvalt
10,13 In zungin sibenzog
10,14 So steit iz in der werlti noch
10,15 Von demi gezugi des stiphtis
10,16 Worti diu Semiramis
10,17 Die burchmura viereggehtich
10,18 Vieri milin lank unti sescihg
10,19 Des turnis bistunt dannoch
10,20 Vieri duser lasterin hohc
10,21 In der burch sint warin

- 10,22 Diu Kuoninge vili mere
10,23 Da havitin ir gesez inne
10,24 Chaldei die grimmin
10,25 Die heritin afder lanten
10,26 Vnzi si Hierusalem virbranten
- 11,1 IN den cidin iz gescach
11,2 Als der wise Danihel sprach
11,3 Duo her sini troume sagiti
11,4 Wi her gesin havite
11,5 Viere winde disir werilte
11,6 In dem michilin meri vehtinde
11,7 Vnz uz dem meri giengin
11,8 Vreislichir dieri vieri
11,9 Viere winde biceichenint vier engele
11,10 Die plegint werilt allere
11,11 Die dier vier Kuonincriche
11,12 Die diu werilt soldin al umbegrifen
- 12,1 DIz eristi dier was ein lewin
12,2 Si havite mennislichin sin
12,3 Diu beceichenit vns alle Kuoninge
12,4 Die der warin warin in Babilonia
12,5 Dere crapht unt ire wisheit
12,6 Gidadun ire riche vili breiht
- 13,1 DAz ander dier was ein beri wilde
13,2 her havide drivalde zeinde
13,3 Her cibrach al daz her ane quam
13,4 Vnti citrat iz vndir sinin clawin
13,5 Der bizeichinote driu Kuonicriche
13,6 Diu cisamine al bigondin grifin
13,7 Bi den cidin duo Cyrus unti Darius
13,8 Gewunnin Chaldeischi hus
13,9 Die zwene riche Kuoninge
13,10 Si cistortin Babilonie
- 14,1 DAs dritti dier was ein lebarte
14,2 Vier arin vederich her havite
14,3 Der beceichinote den Criechiskin Alexanderin
14,4 Der mit vier herin vuor aftir lantin
14,5 Vnz her dir werilt einde
14,6 Bi guoldinin siulin bikante
14,7 In India her die wuosti durchbrach
14,8 Mit zuein boumin her sich da sprach
14,9 Mit zuein grifen
14,10 Vuor her in liuften
14,11 In eimo glase

- 14,12 liez er sich in den se
14,13 Duo wurfin sin vngetruwe man
14,14 Die Kettinnin in daz meri vram
14,15 Si quadin “obi du wollis sihen wunter
14,16 So walz iemir in demo grunte”
14,17 Du sach her vure sich vlizin
14,18 manigin visc grozin
14,19 Half visc half man
14,20 Dad diuht un uili harte vreissam
- 15,1 Duo gedachti der listige man
15,2 Wi her sich mohte generian
15,3 Der wag vurt in in demo grunte
15,4 Durch daz glas sach her manige wunter
15,5 Vnz er mit einim bluote
15,6 Daz scarphe meri gruozte
15,7 Alsi diu vluot des bluotis inpfant
15,8 Si warf den heirin an iz lant
15,9 So quam her widir in sin riche
15,10 Wol intfingin un die Criechen
15,11 Manigis wunderis genihte sich der selbe man
15,12 Driu deil her der werlte z ume gewan
- 16,1 Daz vierde dier ein ebir was
16,2 Die cuonin Romere meindi daz
16,3 Iz haviti isirne clawin
16,4 Daz ne condi nieman gevan
16,5 Isirni ceine vreisam
16,6 Wi sold iz iemir werdin zam
16,7 Wole biceichinit vns daz waltsuin
16,8 Daz did riche ci Rome sal vri sin
16,9 Der ebir cin horn truog
16,10 Mit ten her sini vianti nidir sluog
16,11 Her was so michil unti vorhtsam
16,12 Ci Rome wart diu werlt al gehorsam
- 17,1 CIn horn meintin cin Kuoninge
17,2 Di mit Romerin rittint ci sturme
17,3 Daz eilfti horn wus vnz an den himil
17,4 Die sterin vuhtin imi widir
17,5 Iz hat ougin unti munt
17,6 Suolich ni wart uns e kunt
17,7 Manigi wort iz widir Gode sprach
17,8 Daz her vieli schiere gerach
17,9 Daz biceichinit uns den Antichrist
17,10 Der noch in diese werlt kuonftig ist
17,11 Den got mit sinir gewelti
17,12 C ir hellin sal gesendin

- 17,13 Der troum allir so irging
 17,14 So n der engil vane himele gischiet

 18,1 ROmere scrivin cisamine
 18,2 In einer guoldine tavelin
 18,3 Driu hundert altheirrin
 18,4 Di dir plegin zuht unt erin
 18,5 Die dagis unti nahtis riedin
 18,6 Wi si ir erin bihildin
 18,7 Den volgedin die Herzogin al
 18,8 Wanti si ni woldin Kuoning havin
 18,9 Duo santin si den edelin Cesarem
 18,10 Dannin noch hiude Kuoninge heizzint Keisere
 18,11 Si gavin imi manige scar in hant
 18,12 Si hiezin un vehtin wider Diutsche lant
 18,13 Da aribeti Cesar daz ist war
 18,14 Mer dan ein ihar
 18,15 So her die meinstreinge man
 18,16 ni conde nie biduingan
 18,17 Ci iungist gewan her s al ci gedinge
 18,18 Daz solt in c in erin brengen

 19,1 VNdir bergin ingegin Suaben
 19,2 Hiz her vanin uf haben
 19,3 Deri vordirin wilin mit herin
 19,4 Dari cumin warin ubir meri
 19,5 Mit mislichemo volke
 19,6 Si slugen iri gecelte
 19,7 Ane dem berge Suedo
 19,8 Dannin wurdin si geheizin Suabo
 19,9 Ein liuht ci radi vollin gut
 19,10 Redispen genug
 19,11 Die sich dikke des vure namin
 19,12 Daz si guode Rekkın werin
 19,13 Woli vertig vnti wichaft
 19,14 Doch bedwang Cesar al iri craft

 20,1 Duo sich Beirelant wider in vormaz
 20,2 Die merin Reginsburch her se bisaz
 20,3 Da vant er inne
 20,4 Helm unti brunigen
 20,5 Manigin helit guodin
 20,6 Die dere burg huhdin
 20,7 Wiliche Knehti dir werin
 20,8 De ist in heidnischin buochin meri
 20,9 Da lisit man "Noricus ensis"
 20,10 Daz diudit "ein suert Beierisch"
 20,11 Wanti si woldin wizen

20,12 Daz ingemimi baz ni bizzin
20,13 Die man dikke durch den helm slug
20,14 Demo liute was ie diz ellen gut
20,15 Dere geslehte dare quam wilin ere
20,16 Von Armenie der herin
20,17 Da Noe uz der arkin ging
20,18 Du r diz olizui von der tuvin intfieng
20,19 Iri ceichin noch du archa havit
20,20 Vf den bergin Ararat
20,21 Man sagit daz dar in halvin noch sin
20,22 Die dir Diutischin sprecchin
20,23 Ingegin India vili verro
20,24 Peiere vurin ie ci wige gerno
20,25 Den sign den Cesar an un gewan
20,26 Mit bluote must er in geltan

21,1 DEr Sahsin wankeli mut
21,2 Ded imo leidis genug
21,3 So r si wand al ubirwundin havin
21,4 So warin si mi aver widiri
21,5 Die lisit man daz si wilin werin al
21,6 Des wunterlichin Alexandris man
21,7 Der diu werlt in iarin zuelevin
21,8 Irvur uns an did einti
21,9 Duo her ci Babilonie sin einti genam
21,10 Duo cideiltin diz richi viere sini man
21,11 Di dir al duo woltin Kuoninge sin
21,12 D andere vuorin irre
21,13 Vuz ir ein deil mit scifmenigin
21,14 quamin nidir c ir Eilbin
21,15 Da die Duoringe duo sazin
21,16 Die sich wider un vermazin
21,17 C in Duoringin duo dir siddi was
21,18 Daz si mihhili mezzir hiezin sahs
21,19 Der di rekkinn manigis druogin
21,20 Da midi si die Duoringe slugin
21,21 Mit untruwin c einer sprachin
21,22 Die ci vridin si gelobit havitin
21,23 Von den mezzerin also wahsin
21,24 Wurdin si geheizzin Sahsin
21,25 Svie si doch ire ding ane vingen
21,26 Si muostin Romerin alle dienin

22,1 CEsar bigonde nahin
22,2 Zu den sinin altin magin
22,3 C en Franken din edilin
22,4 Iri beidere vorderin
22,5 Quamin von Troie der altin

22,6 Duo die Criechin diu burch civaltin
 22,7 Duo ubir diu heri beide
 22,8 Got sin urteil so irsceinte
 22,9 Daz die Troieri sum intrunnin
 22,10 Die Criechin ni gitorstin heim vindin
 22,11 Want in den cin iarin
 22,12 Duo si ci dere sazin warin
 22,13 So gehietin heimi al iri wif
 22,14 Si rieten an iri manni lif
 22,15 Des ward irslagin der kuoning Agamemno
 22,16 Irri vurin d andero
 22,17 Vns Vlix gesindin
 22,18 Der Ciclops vraz in Sicilia
 22,19 Das Vlixes mit spiezin wol gerach
 22,20 Du r slafinde imi sin ouge uz stach
 22,21 Das geslehte deri Ciclopin
 22,22 Was dannoch in Siciliin
 22,23 Also ho cimpoume
 22,24 An dem eindo hatten si ein ouge
 22,25 Nu havit si Got van vns virtribin hinnan
 22,26 In daz gewelde hinehalf India

23,1 TRoieri vurin in der werilte
 23,2 Widin irri after sedele
 23,3 Vns Elenus ein virherit man
 23,4 Des Kuonin Ektoris witiwin genam
 23,5 Mit ter er da ci Criechin
 23,6 Bisiz sinir vianti riche
 23,7 Si worhtin dar eini Troie
 23,8 Di man lange sint mohte scowen
 23,9 Antenor was gevarn dannin er
 23,10 Du r irchos daz Troie solti eigen
 23,11 Der stifted vns diu burg Pitavium
 23,12 bi demi wazzere Timavio
 23,13 Eneas irvaht im Wialilant
 23,14 Da r diu su mit trizig iungin vant
 23,15 Da worhten si diu burg Albane
 23,16 Dannin wart sint gestiftit Roma
 23,17 Franko gesaz mit den sini
 23,18 Vili verre nidir bi Rini
 23,19 Da worhtin si duo mit vrowedin
 23,20 eini luozzele Troie
 23,21 Den bach hizin si Sante
 23,22 Na demi wazzere in iri lante
 23,23 Den Rin havitin si vure diz meri
 23,24 Dannin wuhsin sint Vreinkischi heri
 23,25 Di wurden Cesari al unterdan
 23,26 Si warin imi idoch sorchsam

24,1 Duo Cesar duo widere ci Rome gesan
24,2 Si ni woltin sin niht intfan
24,3 Si quadin daz her durch sini geile
24,4 Haviti virlorin des heris ein michil deil
24,5 Daz her in vremidimo lante
24,6 An urlof so lange havite
24,7 Mit zorne her duo widirwante
24,8 Ci Diutischimo lante
24,9 Da her hat irkunnit
24,10 manigin helit vili gut
24,11 Her sante zu den Heirrin
24,12 Die dar in riche warin
24,13 Her clagit in allin sini noht
24,14 Her bot un golt vili rot
24,15 Her quad daz her si wolte gern irgezzin
24,16 Ob ir un ieht ci leide gedan hetti

25,1 Duo si virnamin sinin wille
25,2 Si saminotin sich dar alle
25,3 Vzir Gallia unti Germania
25,4 Quamin imi scarin manige
25,5 Mit schinintin helmen
25,6 Mit vestin halspergin
25,7 Si brahtin manigin sconin schiltrant
25,8 Als ein vlut vurin s in daz lant
25,9 Duo ci Rome her bigondi nahin
25,10 Duo irvoht ini dar manig man
25,11 Wanti si sagin schinin
25,12 So breite scarin sini
25,13 Vanin ingegin burhtin
25,14 Des libis si alle vorhtin
25,15 Cato unti Pompeius
25,16 rumiti Romischi hus
25,17 Al der Senatus
25,18 mit sorgen vlugin si diur uz
25,19 Her vur un nah iaginta
25,20 Witini slahinta
25,21 Vnz in Egyptilant
25,22 So michil ward der herebrant

26,1 VVER mohte gecelin al die menige
26,2 Die Cesari iltin ingeginne
26,3 Van Ostrit allinthalbin
26,4 Alsi der sne vellit uff in alvin
26,5 Mit scarin unti mit volkin
26,6 Alsi der hagil verit van den wolkin
26,7 Mit minnerigem herige

- 26,8 Genant er an die menige
26,9 Duo ward diz heristi volcwig
26,10 Also diz buoch quit
26,11 Daz in disim merigarten
26,12 Ie geurumit wurde
- 27,1 OY wi di wifini clungin
27,2 Da di marin cisamine sprungin
27,3 Herehorn duzzin
27,4 Becche bluotis vluzzin
27,5 D erde dir untini diuniti
27,6 Di helli ingegine gliunte
27,7 Da di heristin in der werilte
27,8 Suohtin sich mit suertin
27,9 Duo gelach dir manig breiti scari
27,10 Mit bluote birunnin gari
27,11 Da mohte man sin douwen
27,12 Durch helme virhouwin
27,13 Des richin Pompeiis man
27,14 Da Cesar den sige nam
- 28,1 Duo vrouwite sich der iunge man
28,2 Daz her die riche al gewan
28,3 Her vur duo mit gewelte
28,4 Ci Rome sui so her wolte
28,5 Romere duo s in infiengin
28,6 Einin nuwin sidde ane viengin
28,7 Si begondin igizin den Heirrin
28,8 Daz vundin si mi c erin
28,9 Want er eini duo habite allin gewalt
28,10 Der e gideilit was in manigvalt
28,11 Den sidde hiz er duo c erin
28,12 Diutischi liuti lerin
28,13 Ci Rome dedd ir uf das scazhus
28,14 Manig cieri nam her dan uz
28,15 Her gebite sinin holdin
28,16 Mit pellin ioch mit golte
28,17 Sidir warin Diutschi man
28,18 Ci Rome lif unti wertsam
- 29,1 Duo Cesar sin einti genam
29,2 Vnte der sin neve guot diu richi gewan
29,3 Augustus der mere man
29,4 Owisburg ist na imi geheizan
29,5 Diu stifte ein sin stiffun
29,6 Drusus genanter
29,7 Duo ward gesant heirro Agrippa
29,8 Daz her diu lant birehta

- 29,9 Daz her eini burg worhte
29,10 Ci diu daz in dad liuht vorte
29,11 Die burg hiz her Colonia
29,12 Da warin sint herrin maniga
29,13 Avir na selbe demo namin sinin
29,14 Ist si geheizin Agrippina
- 30,1 CI dere burg vili dikki quamin
30,2 Di Waltpodin vane Rome
30,3 Di dir oug er dar in lantin
30,4 veste burge havitin
30,5 Wurmiz unti Spiri
30,6 Die si worhtin al die wili
30,7 Duo Cesar dar in lante was
30,8 Vnt er die Vrankin untersaz
30,9 Duo worht er da bi Rine
30,10 Sedilhove sine
30,11 Meginza was du ein Kastel
30,12 Iz gemerhte manig helit snel
30,13 Da ist nu dere Kuoninge wichtum
30,14 Dis Pabis senitstul
30,15 Mezze stifte ein Cesaris man
30,16 Mezius geheizan
30,17 Triere was ein burg alt
30,18 Si cierti Romere gewalt
30,19 Dannin man unter dir erdin
30,20 Den win santi verri
30,21 Mit steinin rinnin
30,22 Den herrin al ci minnin
30,23 Die ci Kolne warin sedilhaft
30,24 Vili michil was diu iri craft
- 31,1 IN des Augusti citin gescahc
31,2 Daz Got vane himele nider gesach
31,3 Duo ward giborin ein Kuoning
31,4 Demi dienit himilschi dugint
31,5 Iesus Christus Godis Sun
31,6 Von der megide Sente Mariun
31,7 Des erschinin san ci Rome
31,8 Godis zeichin vrone
31,9 Vzir erdin diz luter olei spranc
31,10 Scone rann iz ubir lant
31,11 Vmbe diu Sunnin ein creiz stunt
31,12 Also roht so viur unti blut
31,13 Wanti duo bigondi nahin
31,14 Dannin uns allin quam diu genade
31,15 Ein niuwe Kuonincrichi
31,16 Demi muoz diu werilt al intwichin

32,1 SEnti Petir dir boto vrone
 32,2 Den diuvil ubirwant ir ci Rome
 32,3 Her rethi da uf dis heiligin crucis ceichin
 32,4 Her screif diu burg ci Cristis eagine
 32,5 Dannin sant ir dri heilige man
 32,6 Ci predigene den Vrankan
 32,7 Eucharium unti Valerium
 32,8 Der dritti geinti uff in leige
 32,9 Da kerdin di zvene widere
 32,10 Senti Petri daz ci clagine
 32,11 Dari sant er duo sinin staf
 32,12 Den legitin si uffe Maternis graf
 32,13 Si hizin un wider von dem tod erstan
 32,14 In Senti Petiris gibote mit un ci Vrankin gan
 32,15 Duo her sinis meisteris namin virnam
 32,16 Her ward un san gihorsam
 32,17 Duo intloich sich diu molta
 32,18 Als iz Got wolta
 32,19 Her vieng sich ci demi grasi
 32,20 Schiere ilt er us demo gravi
 32,21 Da r vircig dagi hatti gilegin
 32,22 Duo must er vircig iar lebin
 32,23 C erist si du ci Trierin lertin
 32,24 Dar na si Kolni bikertin
 32,25 Da bischof ward der selbe man
 32,26 Der vane demi todi was irstantan

33,1 Duo gewunnin si da ci Vrankin
 33,2 Ci Godis dienisti vili manigin man
 33,3 Mit beizzirimo wige
 33,4 Dan si Cesar gewanne wilen
 33,5 Si lertin si widir sunde vehtin
 33,6 Daz si ci Godi werin guode Knechte
 33,7 Dere lere sint wole plagin
 33,8 Di bischove na hin warin
 33,9 Dri unti drizig gezalt
 33,10 Vns ane Seint Annin gewalt
 33,11 Dere sint nu heilig sibine
 33,12 Die schinint uns von himele
 33,13 Als iz sibirin sterrin nahtis dunt
 33,14 Seint Anno lieht is her unti guot
 33,15 Vntir d andere braht er sinin schim
 33,16 Alsi der jachant in diz guldini vingerlin

34,1 DEn vili tiurlichin man
 34,2 Muoge wir nu ci bispili havin
 34,3 Den als ein spiegil ane sin

34,4 Die tugint unti warheiti wollen plegin
34,5 Duo der dritte Keiser Heinrich
34,6 Demi selbin heirrin bival sich
34,7 Vnti der godis willo was irgangin
34,8 Dar her ci Kolne ward mit lobe intfangin
34,9 Duo gieng her mit liutcrefte
34,10 Alsi diu Sunni duoht in den liufte
34,11 Diu inzuschin erden unti himili geit
34,12 Beidenhalbin schinit
34,13 Also gieng der bischof Anno
34,14 Vure Gode vnti vure mannen
34,15 In der Phelinzin sin tugint suolich was
34,16 Daz un daz rich al untersaz
34,17 Ci Godis diensti in den geberin
34,18 Sam ir ein engil weri
34,19 Sin ere gihilt er wole beidinthalb
34,20 Dannin ward her ci rehtimi hertumi gezalt

35,1 SIn guote bikanti vil unmanig man
35,2 Nu virnemit Wi sini siddi warin gedan
35,3 Offen was her sinir worte
35,4 Vure dir warheite niemannin her ni vorte
35,5 Als ein lewo saz her vur din vuristin
35,6 Als ein lamb gin her untir diurftigin
35,7 Den tumbin was her sceirphe
35,8 Den guotin was er einste
35,9 Weisin unti widewin
35,10 Die lobitin wole sinin sidde
35,11 Sini predigi unti sin ablaz
35,12 Ni mohti nichein duon baz
35,13 Also gotliche
35,14 dad iz mit rehte solte lichen
35,15 Allir irdischir diet
35,16 Gode was her vili liep
35,17 Selicliche stunt Kolnische werlt
35,18 Duo si suolichis bischovis warin werht

36,1 SO diz liuht nahtis ward slafin al
36,2 So stunt imi uf der vili guote man
36,3 Mit luterer sinir venie
36,4 Suht er muonistere manige
36,5 Sin oblei her mit imi druog
36,6 Dir armin vant her genug
36,7 Die dir selide niht hattin
36,8 Vnt imi da ware dadin
36,9 Da diz armi wif mit demi kindi lag
36,10 Der dir nieman ni plag
36,11 Dari gienc der bischof vrono

- 36,12 Her gebettidi iri selbe scono
36,13 So her mit rehte mohte heizin
36,14 Vatir aller weisin
36,15 So harte was er in genedig
36,16 Nu havit is imi Got gelonit
- 37,1 Vili selicliche diz riche alliz stunt
37,2 Duo dis girihtis plag der heirre guot
37,3 Duo her zo ci demi richi
37,4 Den iungen Heinriche
37,5 Wilich rihtere her were
37,6 Das quam witini mere
37,7 Van Criechin unt Engelantin
37,8 Die Kuoninge imi gebi Santin
37,9 So dedde man von Denemarkin
37,10 Von Vlanterin unti Riuzilanti
37,11 Manig eigin her ci Kolni gewan
37,12 Di muonister ciert er ubiral
37,13 Ci demi tiurin Gotis lobe Stift ir
37,14 selbo vier muonister
37,15 Diz vunfti ist Sigeberg sin vili liebi stat
37,16 Dar uffe steit nu sin graf
- 38,1 NI avir diu michil ere
38,2 Iewiht wuorre sinir selin
38,3 So dede imi Got also dir goltsmid duot
38,4 So r wirkin willit eine nuschin guot
38,5 Diz golt siudit her in eimi viure
38,6 Mit wehim werki duot her si tiure
38,7 Mit wierin also cleinin
38,8 Wole slift her die goltsteine
38,9 Mit manigir slahtin gigerwa
38,10 Gewinnit er in die variwa
38,11 Also sleif Got Seint Annin
38,12 Mit arbeidin manigin
- 39,1 DIkki im ane vuhtin di Lantheirrin
39,2 Ci iungis braht iz Got al ci sinin erin
39,3 Vili dikki un ane rietin
39,4 Di uone soltin bihuotin
39,5 Wi dikki uone di virmanitin
39,6 Di her ci heirrin braht havite
39,7 Ci iungis ni wart daz niht virmidin
39,8 Her ni wurde mit gewefinin uze dir burg virtribin
39,9 Als Absalon wilin
39,10 virtreib vater sinin
39,11 Den vili guotin David
39,12 Disi zuei dinc harti si warin gelich

- 39,13 Leidis unte arbeite genug
 39,14 Geniht sich der heirro guot
 39,15 Al nah dis heiligin Cristis bilide
 39,16 Duo sunt iz Got van himele
- 40,1 DAr nah ving sich ane der ubile strit
 40,2 Des manig man virlos den liph
 40,3 Duo demi vierden Heinriche
 40,4 Virworrin wart diz riche
 40,5 Morht roub unti brant
 40,6 Civurtin kirichin unti lant
 40,7 Von Tenemarc unz in Apuliam
 40,8 Van Kerlingin unz an Vngerin
 40,9 Den niman ni mohte widirsten
 40,10 Obi si woltin mit truwin unsamit gen
 40,11 Diz stiftin heriverte groze
 40,12 Wider nevin unti husgenoze
 40,13 Diz riche alliz bikerte sin gewefine
 40,14 In sin eigin inadere
 40,15 Mit signuoftlicher ceswe
 40,16 Vbirwant iz sich selbe
 40,17 Daz di gidouftin lichamin
 40,18 Vmbigravin ciworfin lagen
 40,19 Ci ase den bellindin
 40,20 Den grawin walthundin
 40,21 Duo daz ni truite bisuonin Seint Anno
 40,22 Duo bidroz uone lebin langere
- 41,1 HEr reiht ci Salivelt in Duoringe lant
 41,2 Da irbarit imi Got diu simi hant
 41,3 Einis dagis ingegin none
 41,4 Dir himil indedde sich scone
 41,5 Da sach her inne
 41,6 diu goteliche wunne
 41,7 Di her ni dorsti kuondin
 41,8 Nicheinimo weritlichim manne
 41,9 Duo her uff sinim wagene lag
 41,10 Vnt er sinis gebeddis plag
 41,11 Suolich mancrafft un umbevieng
 41,12 Daz man sescein ros ci demo wagine spien
 41,13 Duo duoht hun daz her sege
 41,14 Suad so dor iemir kuonftig were
 41,15 Vili harte untirquam sig is der heilige man
 41,16 Duo bigond ir dannin sichen
- 42,1 EInis nahtis der heirro duo gesach
 42,2 Wi her quam in einin vili Kuoniglichin sal
 42,3 Ci wuntirlichimi gesidele

- 42,4 So iz mit rehti solde sin ci himele
 42,5 Duo duoht un in siumi troume
 42,6 Wi z allinthalvin were bihangin mit golde
 42,7 Di viuli tiurin steini liuhtin dar ubiral
 42,8 Sanc unti wunne was dir groz unti manigvalt
 42,9 Duo sazin dar bischove manige
 42,10 Si schinin also die sterrin cisamine
 42,11 Dir bischof Bardo was ir ein
 42,12 Senti Heribret gleiz dar als ein goltstein
 42,13 Andere heirin genug
 42,14 Vn was ein lebin unt ein muht
 42,15 Duo stunt dir ein stul ledig unt eirlich
 42,16 Seint Anno wart sinis vili gemeiht
 42,17 Her was ci sinin erin dar gesat
 42,18 Nu lobit her s Got dad iz also gesach
 42,19 O wi gerne her duo geseze
 42,20 Den libin stul wi gern er bigriffe
 42,21 Dad ni woltin gelobin di vurstin
 42,22 Durch einin vlekke vure sinin brustin

 43,1 VF stunt dir heirrin ein hiz Arnolt
 43,2 Ci Wurmizi was her wilin Bischof
 43,3 Seint Annin nam her mit handin
 43,4 So quamin si dar bihalvin
 43,5 Mit suozir redin her un duo bistunt
 43,6 Her sprach “trosti dig heirro Godis druot
 43,7 Disin vlekkin wisi hine gedun
 43,8 Ci ware dir is gereit der ewigi stul
 43,9 Daz sal sin in curtin stundin
 43,10 So bis tu disin heirrin willicumin
 43,11 Vntir un ni maht tu nu blivin
 43,12 Wi lutir iz sal sin dad si willin lidin
 43,13 Crist havit tir disi ding irougut
 43,14 Owi heirro wad tir erin unti genadin volgit”
 43,15 Harti ginc iz Imi ci hercin
 43,16 Daz her widere kerin solde z ir erdin
 43,17 Ni wer it duo ci stundin so gewant
 43,18 Durch alle diusi werilt ni rumit er daz Paradysi lant
 43,19 Suolich is diu himilschi wunne
 43,20 Dar sule wir denkin alt unti iungin
 43,21 Von demi slafe dir heirro duo gestunt
 43,22 Wole wist er wad her solde dun
 43,23 Kolnerin virgab her sini hulte
 43,24 Daz her si hazzite wi groz dar warin ere sculte

 44,1 Duo dat cit duo begonde nahen
 44,2 Daz imi Got wolte lonin
 44,3 Duo ward her gikeistigit

44,4 Als dir heiligi Iob wilin
 44,5 Vane vuoizin vns an diz hoibit
 44,6 So harti al bitoibit
 44,7 So schit diu tiure sela
 44,8 Von mennislichimo sera
 44,9 Von disimo siechin libi
 44,10 In das ewigi paradysi
 44,11 Diz vleisc intfinc du erda
 44,12 Dir geist vur up ci berga
 44,13 Dari sule wir iemir nah imo deinkin
 44,14 Wa wir ci iungist sulin leintin

45,1 ALs er duo ci Godis antwurte quam
 45,2 C in ewigin ginadin
 45,3 Duo dedde dir heirro edile gemut
 45,4 Also dir ari sinin iungin duot
 45,5 So r si spanin willit uz vliegîn
 45,6 Her suemit ob in ce cîerin
 45,7 Her wintit sich uf ci berge
 45,8 Daz sint dint die iungin gerne
 45,9 Also wold ir uns gespanin
 45,10 Wari wir na imi soldin varin
 45,11 Her zoigit uns hi nidine
 45,12 Wilich lebin si in himile
 45,13 Ci demi gravi da si ni woltin doht havin
 45,14 Da worht ir scone ceichin
 45,15 Die sichin unti die crumbe
 45,16 Die wurdin da gesunde

46,1 ARnolt hiez ein vollin guot kneht
 46,2 Der havit einin vogitman hiez Volpreht
 46,3 Der durch werltliche sculde
 46,4 Virlos sinis heirrin hulte
 46,5 Duo bigond er Godi missitruwin
 46,6 Helphe suoht er an din tiuvil
 46,7 Her kos vn imi ci vogite
 46,8 wider Arnolde
 46,9 Einis abindis ginc her einin ganc
 46,10 Na sinimo rosse einis veldis lanc
 46,11 Da irschein imi der tiuvil offene
 46,12 Her virbot imi alle Cristis e
 46,13 Vnt her nimanni daz ni sagite
 46,14 Wi her un gesin havite
 46,15 Her quad giwuge her s eincheinim manne
 46,16 Her cibrech in ci stuokkelini allin
 46,17 Wolt er avir imi volgin
 46,18 So hett er imi gewissin holtin
 46,19 Mit dron unti mit geheizan

- 46,20 Virleitt er duo den tumbin man
 46,21 Daz her geliz sich c is viantris truwin
 46,22 Daz ward imi sint ci ruwin

 47,1 DEs andren tagis her mit Arnolde reiht
 47,2 Dis tiviulis geheizi was her vili gemeit
 47,3 Mit misselichin redin her dar zu quam
 47,4 Daz her Godis bigonde virlouchinan
 47,5 Godis heiligin bigond er lasterin
 47,6 Daz niman ni solti gebaldin
 47,7 Vnzi duo der vili tumbe man
 47,8 Bigondi lasterin Seint Annin
 47,9 Her quad dad her iz al wol irkante
 47,10 Iz wer al triugeheit unti scante
 47,11 Anno lebit ie mit suntin
 47,12 Wad ceichine her getuon solte
 47,13 Dere vreblichin schelti
 47,14 Muost er san intgeltin
 47,15 Da ci stede sin ouge winister
 47,16 Vuor imi uz als ein wazzer
 47,17 Duo der ungeloubige man
 47,18 Ni woltt sich irkeinnin
 47,19 Her ni wolti Seint Annin sceltin
 47,20 Duo muoste her s mer intgeltin
 47,21 Durch sin hoibit quam ein slag
 47,22 Daz her dir nidiri gelach
 47,23 Als ein gescoz daz ouge ceswe
 47,24 Spreiz uz imi verre
 47,25 Duo vil her nidir an did gras
 47,26 Her schrei als imi was
 47,27 Harti irquamin si sich des ubiral
 47,28 Si bedditin ci Gote in crucestal

 48,1 ARnolt his dradi rennnin
 48,2 Paffen imi dari gewinnin
 48,3 So vuorhtin si in c einir kirichin
 48,4 Si lertin un sini pigihti tun
 48,5 Vnzi duo der seregi man
 48,6 Sent Annin ane dingin bigan
 48,7 Her bat sinir genadin
 48,8 Daz her den gesunt imi virgabi
 48,9 Michil wunter sagin
 48,10 Alli di duo da warin
 48,11 In den itilin ougistirnin
 48,12 Wuhsin niuwe ougin widere
 48,13 Daz her san ci stundin woli gesach
 48,14 So scone ist diu Godis craft

49,1 VOn altin ewin ist daz kunt
49,2 Wi sich wili uf tedde der merigrunt
49,3 Duo Moyses das liut Israel
49,4 Mit trukkenim wegge leite ubir se
49,5 Ci demi allirbezzistin lante
49,6 Des die guotin ouch sulin waltin
49,7 Da die becche miliche vluzzin
49,8 Diz suoze honig dar inzuschin
49,9 Diz olei uz eime steine sprunge
49,10 San dir bi der suoze brunne
49,11 Diz brot vane himele reginete
49,12 Allis gudis si seide habiten
49,13 Mit wuontirlichin ceichinin
49,14 Erete got Moysen den heiligin
49,15 Vnz ein sin selbis suster
49,16 Bigond imi sprecchin laster
49,17 O wi starche si di misilsuht bistunt
49,18 Vnz iri gewegete der bruoder gut
49,19 Also gewegete Seint Anno disim man
49,20 Daz her sini gesunt gewan
49,21 Ci diu daz wir virstuntin
49,22 Des richin Godis guote
49,23 Wi her so lonit unti ricchit
49,24 Suaz man sinin holtin spricchit
49,25 Der so suoze leidet albihanten
49,26 Ci demi sconin paradysi lante